



Naalackersuisut kingusinnerpaamik UPA2020-mi Kalaallit Peqqissartut Angerlarsimaffianni kalaaliminernik atuinerup qanoq iliorluni annertusineqarsinnaanera pillugu misissuineramik suliaqarnissaat pillugu Inatsisartuni aalajangiiffigisassatut siunnersuut. Misissuinermi - ajornanngippat - igaffissuarmi igaat kalaaliminersunninnerat qanoq ililluni annertunerulersinnaanera pillugu kaammattuuteqarfigineqassaaq.

(Inatsisartunut ilaasortaq Stine Egede, Inuit Ataqtigiit)
(Siullermeerneqarnera)

Kalaallit Danmarkimi peqqissartut angerlarsimaffianni uninngasut angerlarsertaqaat ernuamllutillu. Nappaatigilersimasaq pillugu ernumasoqartarpoq allaallu annilaangasoqartarluni. Ilaquttat ikinngutillu maqaasineqartarput. Illoqarfigisaaq nunaqarfigisaaq maqaasineqartarput. Angerlarsimaffik pialuutillu ujariatsigineqartarput. Maqaasinerit ujariatsinerillu politikikkut susinnaarpiangilagut. Ajoraluartumik.

Aamma qularnanngilaq uninngasut amerlanerpaartaasa kalaalimerngit kalaaliminilioriaaserlu maqaasisassagaat. Tamatta isumaqatigiissutigipallaannarsinnaagunarpaput kalaalimerngit nerisassaammata nalissaqanngitsut. Nunani allani imaaliallaannaq kalaaliminersiniartoqarsinnaanngilaq. Taamaatumik amerlanerpaatigut nunani allaneereerluni angerlaqqilernermi mattak suaasalluunniit usseqqinnissaat qilanaarineqartaqaat.

Aamma taamaagunavippoq kalaaleqatitsinnut Danmarkimi peqqissartut angerlarsimaffianni uninngasunut.

Ujariatsinerli iliuuseqarfigineqarsinnaavoq. Kalaallimmi peqqissartut angerlarsimaffianni uninngasut ullumimut naleqqiullugu ajornannginnerusumik kalaaliminiliorternissaat isumaginiarsinnaavarput. Demokratini isumaqarpugut ajunngissagaluqaqisoq.

Maanna siunnersuut aqutigalug IA-p misissortinniarpa kalaallit qallunaat nunaanni peqqissartut angerlarsimaffianni uninngasut igaassanik suliareriikkanillu kalaalimintornerusalernissaat. Arraa, ilumut pisariaqarpa misissuititsinissarput? Ajornannginnerusumik pisariinnerusumillu tamanna naammassineqarsinnaannginnami. Misissuititsinnginnitsigut aningaasat sipaagassangut igaassanik piariikkanillu kalaaliminersiniutiinnarsinnaagaluarpagut.

Maluginiarpara Naalackersuisut allannguutissamik siunnersuuteqarsimasut aamma misissuititsinissaq siunertaralugu.

Paasisinnanngilara matumani aalajangernissaaq sooq taama pisariutigissanersooq.

Qulaani taasagut tunngavigalugit Ilaqutariinnermut Peqqissutsimullu ataatsimiititaliaq



kaammattorusuppara allannguutissamik siunnersuuteqaqqullugu, misissuinissaq peertussanngorlugu paarlattuanilli aalajangiinnarlugu kalaallit peqqissartut angerlarsimaffianni uninngasut igaassanik piariikkanillu kalaaliminertornerusalernissaat qulakkeerneqassasoq.

Taamatut naqissusiillunga siunnersuut Ilaqutariinnermut Peqqissutsimullu Ataatsimiititaliamut innersuuppara suliareqqitassanngorlugu.